



*Comme Sainct Paul allant en Damas persecuter les Chrestiens ,  
fut conuertý miraculeusement.*

**S**AVL estant plein de menaces & d'affection de meurtres contre les Disciples du Seigneur, vint au grand Prestre, & luy demanda lettres pour porter en Damas aux Synagogues, afin que s'il se trouuoit quelques-vns qui creussent en Iesus-Christ, hommes & femmes, il les amenast liez en Ierusalem. Aduint qu'en cheminant il approcha de la ville de Damas, & soudain vne lumiere resplendit du Ciel, & estant tombé par terre il ouït vne voix qui luy disoit : Saul, Saul, Pourquoi me persecutes-tu ? Et Saul dit, Qui es-tu Seigneur ? & le Seigneur dit, Je suis Iesus lequel tu persecutes, il t'est dur de regimber contre l'aiguillon. Lors Saul tremblant & effrayé, dit ; Seigneur, que veux tu que ie fasse ? & le Seigneur luy dit, Leue-toy & entre en la Ville, & là il te sera dit ce qu'il te faudra faire. Ainsi Saul se leua de terre ne voyant goutte, & fut conduit en la Ville, où il fut trois iours sans voir, & sans manger ne boire. Et Ananias le vint trouuer, & en mettant les mains sur luy, dit, Saul frere, le Seigneur Iesus, qui t'est apparu par le chemin m'a enuoyé, afin que tu recoures la veuë, & sois remply du Sainct Esprit. Et soudainement cheurent de ses yeux comme des escailles, & il recoura la veuë ; puis il se leua, & fut baptisé, & nommé Paul : & ayant mangé il reprit ses forces, & a esté vn vaisseau d'election pour porter deuant les Gentils & les Rois, & les enfans d'Israël, le nom de Iesus.